



STINAPA TA INFORMA

MI PROPIO "BUSHMAN"

Un di su hòbinan mas grandi ta kushiná pa hopi hende. Speshalmente platonan Karibeño i Internashonal. El a bini speshal Boneiru bèk foi Hulanda na 2000 pa su 3 yunan por disfrutá di nan famia akí. Su estudio di Maneho di Hotèl na Hulanda a habri kaminda pa Raschka Anthony-Willem traha den e sektor hotelero. Aktualmente e ta traha na un villa i tin e maneho diario na su enkargo. "Pa mi naturalesa ta algu asina puru, natural. 'Intachabel' mes e ta bunita kaba! Mi gusta e koló bèrdè di nos naturalesa ku ta indiká 'fertilidat'. Mientras ku mi ta enkantá ku e holó puru. Mi ta sinti mi bon tur kaminda ku tin hopi mata. No ta importá si ta den mondi òf den kurá di mi mayoran. Un otro parti di naturalesa boneriano ku mi gusta mashá tambe ta e paranan, bientu i zonido di laman. E echo ku nos naturalesa ta 'intachabel' ta un luho ku nos mester ta orguyoso dj dje!" Raschka ta sigui elaborá ku e parti 'puru' di nos naturalesa, tantu bou di awa komo riba tera, ta atraé turistanan. Dor di desaroyonan di ekonomia den otro pais hopi parti di nan naturalesa a bai pèrdí. Por ripará por ehèmpel kon turistanan ta para studia un lagadishi ku masha atenshon. Of kon nan ta para 'zoom' ku nan kamara pa saka e flornan bunita di Kibrahacha riba seru. Naturalesa ta un di e fuentenan di nos ekonomia, segun Raschka. E importansha ta masha haltu. Su kasá a lanta meimei di naturalesa. Bibando komo mucha sin frishidèl i komiendo kuminda fresku di Boneiru tur dia prepará riba kandela di palu òf stof di kerosin. Raschka a siña masha di dje enkuantu relashon di hende ku naturalesa. E ta duna komo ilustrashon ku su kasá por pronostiká ki tempu lo bini dependé e tipo di nubianan. "Mi propio 'bushman", Raschka ta terminá sonriendo. *Skirbí pa Natalie Wanga.*

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru